

Ina sessiun da giuventetgna il 2023

Mesjamna ha il parlament communal Ilanz/Glion approbau la nova lescha per la promoziun dalla cultura. Sco quei che la vischnaunca scriva en ina communicaziun allas medias muncava entochen ussa ina basa legala che reglescha ina promoziun dalla cultura a moda transparenta e harmonisada. Ina cumissiun accumpignonta da 17 persunas, cun representants dallas differentas spartas culturalas e da tutas fracziuns ha elaborau il rapport da basa ed il sboz dalla lescha. Ins vul rinforzar la cultura en vischnaunca culs instruments da promover extendidamain. Per con ch'ins drova quels, vul gir las contribuziuns finanzialas, dependa dallas activitads ed iniziativas dallas uniuns e dils artists. Previu eis ei d'eleger ina cumissiun da cultura, quella deliberescha las damondas da sustegn per mauns dalla suprastanza communal.

Risguardar atgnadads dallas fracziuns

Plinavon ha il parlament tractau il parcar vehichels sigl entir intschess communal. Quei sectur vulan ins fixar e reglar en ina lescha. Il gremi legislativ dalla vischnaunca ei dil medem meini sco la suprastanza communal, ei drovi ina regulaziun, ein omisdus gremis perschudi. Els criticheschon denton ch'ins ha dau el sboz dalla lescha memia pauca peisa allas atgnadads dallas singulas fracziuns. Ins stoppi s'approfundir ella damonda per tgei diever ch'igl incasso da taxas seigi raschuneivels. Per quei motiv ha il parlament refusau la proposta dalla lescha cun l'incumbensa da surluvrar ella e d'engaschar per quei intentina cumissiun cun representants dallas fracziuns.

Program da vias e giuventetgna

Ultra da quei ha la suprastanza communal presentau al parlament il program per la construcziun da vias. Risguardond stan e situaziun dallas vias han ins elaborau ina strategia da mesiras. Quel indichescha cura e cons dils kilometers dallas vias communalas ch'ins duei sanai. Per ils proxims 30 onns eis ei da quintar cun investiziuns da 30 milliuns francs per mantener la substanza.

Il parlament communal ha plinavon giu caschun da prender envesta ella lavur d'ina futura cumissiun da giuventetgna. Quella ei vidlunder da realisar ina sessiun da giuventetgna. Ella vischnaunca Ilanz/Glion maunca ina cumissiun ella quala ils giuvenils e giuvens carschi san importar ella politica ils giavischs da lur generaziun. La cumissiun duei secumponer da scolaras e scolaras dil scalem superiur, da giuvens carschi denter 16 e 25 onns, d'in representant dalla suprastanza communal sco era d'in commember dil parlament communal. La suprastanza communal ei cumpetenta d'eleger quella cumissiun, lezza vul organisar mintga dus onns ina sessiun da giuventetgna. Duront quella san participontas e participonts discutir las tematicas da giuventetgna, intent a cuorta tochen liunga vesta eis ei da promover e

pussibilitar ina participaziun politica viva e persistente, vinavon duei la sessiun colligiar ils giuvenils. Ils projects e giavischs tractai vegnan surdai alla suprastanza communal.

Sco quei che la vischnaunca scriva vinavon ella communicaziun, vegnan commembras e commembers dil parlament communal, sco era coaches, a sustener ils giuvenils durant la sessiun da giuventetgna da Ilanz/Glion. L'emprema ediziun ei planisada ils 29 d'avrel 2023.
(cdm/fmr/abc)